

En fin nostre

Monsieur,

Version se va presenter a Son Excellence, & le libraire
luy mesme la porte, pour estre introduit par vostre interven-
tion. Je suis marry que leur presse ait este si tardive,
et qu'elle ait fait si long temps attendre, ce que je leur
avois donne de si bonne heure. Toutesfois si c'est assez
bien, ce sera assez tost: et de leur part, certes, ils ont
employe de bonnes matieres, & l'ouvrage est beau. Si
le langage qu'il parle n'est digne de la chose, ni des
conceptions du premier auteur, j'y ai apporte ce que j'ay
peu, & n'y suis pas propose l'elegance, mais la fa-
cilité, ayant eu pour but de le faire entendre, non de
le farder. Il pourra estre arrive qu'en quelques choses,
j'auray parle comme un clerc d'armes; mais ce defect
sera facilement suppliee par ceux auxquels appartient
les faits d'armes, & qui en savent mieux les termes. Tout
ce que je desire, c'est que son Excellence le puisse lire
sans achopement, & qu'il luy plaise avoir agreable le
desir que j'ay eu de luy complaire, si je n'en ai du tout
atteint la fin. J'espere bien toutesfois que je l'auray rendu
clair. Je n'en escri point immediatement a son E. n'ayant
point voulu que mon nom y parust, pour n'en empescher
le debit parmi ceux qui en eussent pris ombrage. J'y ai laisse
la dedicace de l'auteur. Aussi que je ne me veax point
rendre importun par mes lettres, parmi tant d'autres & plus

importantes occupations qui l'assiègent. Seulement vous
supplieray-je l'asseurer de mon obéissance. J'ay receu lettres
de Madame de La Tremoille qui estoit a Chastillon sur Loing,
Et s'en alloit le lendemain a Chateau-Renard, ou elle estoit
attenduë par ses gens; Et Monsieur Vaufin l'attendoit ausij
avec toute resolution de luy donner tout le contentement qu'il
pourroit, comme il me l'a escrit. Elle desire toutes fois qu'il
plaise a son E. de faire escrire un mot aux officiers de la
terre, pour leur tesmoigner qu'il a eu fort agreable, qu'elle
ait desire passer la quelques jours, & qu'il leur commande
de luy rendre tous devoirs de respect &c. Si vous trouvez
son E. a propos, je vous supplie luy en parler; et en cas
qu'il le trouve bon, ou m'envoyer la lettre, ou vous mesme,
l'adresser a Monsieur Vaufin, qui me mande avoir fait
repasser une tour, Et sous les armes de son E. y avoir fait
graver ce distiche de Grocius,

Quem timet Hispanus, Batavus colit, Indus adorat,
Hoc studium proavis, vivere jus sit opus.

Peut estre vous aura il donne le mesme advis; mais cela
ne peut nuire, si je le repete. Ce me sera un grand gain,
si comme vous m'avez si cordialement assure de vostre
bonne volonte, il vous plait m'honorer, comme je l'espere,
de la continuation, & comme vous estes en possession de
ce que je puis, il vous prend quelque envie d'en faire
l'essay en me commandant aux occasions, auxquelles je
ne faudray a vous tesmoigner que je suis véritablement

Monsieur,

De Leyden le 14 Juillet 1631.

Vostre tres-humble & tres-affecté serviteur,
André Rivet

Monsieur, J'ay apperceu en couran
quelques fautes eschapées aux imprimeurs que j'ay marquées
à la fin. Je viens encore de veoir en la page 191. lin. 11.
un selon Superflu, sur lequel je vous prie d'omettre un coup de plume.



A Monsieur,

Monsieur Huquens, Conseiller,
Et Secetaire De Monseigneur
Le Prince d'Aurange.

Au Camp.